

蘭洲詩稿

11
419

5 6 7 8 9 10 11 12 13 14 15 16 17 18

始



蘭洲詩稿


全

11-419



蘭洲詩稿

大正
10. 2. 15
内交



大正辛酉一月

梧却題簞

序

蘭洲深澤君。吟社友也。頃日來似一卷曰。吾將刊我集。盍辯一言於卷端。因憶峽中詩壇。曩有富岡耿介翁。爲盟主。鼓舞作興。才俊之士。雲合霧集。應酬贈遺。窮一時之盛矣。已而逢翁下世。他亦萍散。見在于今者。寥寥僅居什之一耳。是以氣勢頓挫。吞聲潛影。有其存其歿亦未可知者焉。雖謂世態變替。抑不可慨以慷耶。君獨不捐其操主。敢然欲持此問世。非至篤好而何。若以君之志爲志。彼什一之士。復足以吐氣揚威矣。然即君之此舉。或啓詩壇再造之機運。重得

觀炳蔚偉觀乎。請徵諸後日云爾。

辛酉首春

靜所散人

蘭洲詩稿 第一集

峽南蘭洲深澤儀喜

丙申歲旦

掃蕩妖雲曆改時。相逢相遇樂嬉々。蠢愚也識眞天子。蠻嶋挑來旭日旗。

春日偶成

托跡林泉養此心。山屏石枕愜幽襟。爭名競利非吾事。獨喜田園趣味深。

鳥啼花笑引幽人。眼看森羅萬象新。春滿山中誰共



語。微吟獨立水之濱。

與蘆堂主人同浴下部溫泉

閑見眼前山水嬌。茅茨點綴景難描。溪頭況有靈泉在。好伴吟朋避世囂。

前峰如削雨晴初。千萬風光壓客居。最喜箇中多樂事。靈泉浴罷讀奇書。

又浴下部溫泉

青山陰晦雨霖々。簷角時聽轉小禽。三浴三餐日程外。白雲窓底獨長吟。

展亡友墓

新墳日落詎堪哀。暗憎烏雲暮色催。一往沙場君不返。紫蘭香徑獨低徊。

秋夜步月

滿目秋澄氣味新。哀虫憐爾苦吟身。仰看明徹團圓月。倒影前川涵一輪。

秋夜讀書次片田花仙君韻

寒燈一穗坐深更。繙史無端萬感生。白露溥々破窓外。終宵聽徹暗蛩聲。

詠史

月白旌旗入壯觀。龍驤虎視碎心肝。英雄胸裡風流

在。橫槩詩成雁影寒。

村居

稻穗蕎花取次秋。躬耕獨樂有何求。野人也解風流趣。斜照塘邊策牧牛。

所見

危巖十里俯秋潭。落木蕭條送夕嵐。釣罷漁夫何處去。斜陽只任綠波涵。

初冬偶拈次家弟默齋韻

四山蕭殺夕陽昏。落木風邊小々垣。寄宅山村人惆悵。朝聽寒鳥夕哀猿。

歲晚書懷

環堵晏如逃世塵。乾坤枉托苦吟身。晴耕雨讀無他事。詩滿奚囊不說貧。

同題

匆匆烏兔獨悲辛。忙殺家人漫掃塵。落木蕭々催短景。斜陽閃々照前津。回頭物象追年改。滿目風光惹感頻。書屋剪燈深夜坐。投毫幾度嘆沈淪。

歲首書懷

雪樣吟髭霜樣眉。瓶梅香裏幾傾卮。今朝山叟陶然醉。賦得開春第一詩。

曉起迎新多所思。抽毫先賦一篇詩。窓前恰有梅花綻。脈々清香泛酒卮。

寒夜枕上

雪餘風竹玉琅玕。月上書窓影也闌。一卷枕頭燈火暗。漫々永夜思千般。

寄蘆堂詩宗

南陽景物富詩材。借問魁春苑裏梅。鶯亦不知人不說。東風宛送暗香來。

閑居

遠屋梅花一樣清。初三弦月太憐生。伴吾詩卷兼樽

酒。誦到林詩最有情。

初春村居

檐端鳥雀興偏幽。屋後梅花似舊不。明日詩筇何處着。山村水廓幾停留。

寄木內椿山翁

雨讀晴耕富水濱。躬行實踐見天真。吾翁心事人知否。慨世多年髮似銀。

雪中偶拈

紛々白雪滿林巒。光景尤宜把酒看。盡日清閑無客到。擁將爐火不知寒。

積雪堆中一逕斜。蕭條玉樹着寒鴉。詩情酒味箇中
好。竟日低回不出家。
千山一色白玲瓏。簑笠何人行畫中。不是灞橋尋句
去。便知湖畔訪林公。

即事

四山殘雪畫圖中。回首前林仍朔風。此際吾儕無一
事。讀書隨意舊簾櫳。

書感

老屋寒燈一穗明。讀書坐斷恰三更。繽紛夜雪知多
少。叢竹當窓折有聲。

寄懷家弟在濃州

綠柳紅花處々春。香風暖日托吟身。料知養老飛泉
下。爲憶家翁斟冷醇。

訪山僧不遇

金碧零殘絕客蹤。松濤聲靜白雲封。老僧今日那邊
去。遙望前頭縹緲峰。

夏夜即事

捲盡湘簾杯酒親。座中會有凱旋人。快談空湧涼如
水。無限清光月一輪。
簷外雨過饒夜涼。殘螢光濕竹籬傍。閑人自有閑人

事。兀々敲詩坐草堂。

江頭晚步

涼風一路步江濱。樹影蕭々水疊皴。憔悴憐吾瘦於鶴。行吟偶似獨醒人。

宿山寺

殘燈一穗夜蕭森。空院夢醒涼月侵。不識人間煩熱事。山窓臥聽吼鯨音。
居然石佛影森々。人定禪關夜氣侵。來宿一塵無到境。三更夢冷鐵鈴音。

訪西山矢崎師於大聖寺次鷺村兄詩韻

寂寞香臺綠樹叢。紛々塵事此間空。文談詩話閑窓下。領得清涼一榻風。

明窓開向亂山叢。綠樹白雲連半空。休怪上堂無一句。忘機鎮日坐清風。

歲晚書事用武井孤雲君偶題韻

歲月崢嶸似擲梭。人生其奈易蹉跎。憐吾憔悴鏡中影。双鬢幡々不耐多。

富士川夜泊

蕭寂風光半夜天。奔湍鞞鞞不成眠。篷窓臥見一痕月。喚友猿聲落枕邊。

丁未歲旦

一坐團欒稱賀時。屠蘇到手感多岐。朝來獨喜梅窓下。醉眼攤書探小詩。

謁機山公廟

所之吟社課題

山頭樹色淡煙籠。指點甲陽城趾空。來拜古碑腸斷處。紫蘭香徑吊英雄。

勇武當年摧肺肝。雄圖治水至今安。州民尙記峽公畧。依舊廟前春又寒。

雪中探梅

同

上

江南已發雪中梅。黃鳥不知春色催。折得一枝吟賞

好奇香陣々襲衣來。

昨夜無端夢美人。案頭難折此吟神。村南去訪詩中趣。眼界銀光滿意春。

紀元節恭賦

同

上

二月梅香淡々煙。和風好鳥帝城邊。野人遙拜檀原殿。西伐東征思往年。

上巳看花

山村日暖午風清。處々林園着鳥聲。最是良辰百花麗。綺羅人在畫中行。

桃花釀熟甕頭春。迎客家々醉吉辰。羨殺長禪精舍

裡。酒詩今日會同人。

此日同人開文學會於長禪寺。余以事不往。東郊雨後踏青莎。蛺蝶導吾何地過。知得一村除祓罷。桃花々外笑聲多。

脈々香風上巳天。尋花鎮日弄春妍。眼前風物總詩料。植杖隴頭賦幾篇。

春曉

所之吟社課題

春睡瞳朦雨洒空。輕烟淡靄遠簾櫳。門无客到桑麻地。案有喜存檮散躬。徑草漸生垂柳綠。庭花欲綻野梅紅。悠悠思句山居曉。適意將隨陸放翁。

同題

同上

山色模糊天欲明。枕頭眠覺聽啼鶯。書窓昨夜春衾暖。節近櫻花曉景清。

梅後櫻前暖氣新。拂門煙柳翠眉伸。清晨漱罷閑無事。一鼎茶香洗浴塵。

綠陰烹茗 二首

一庭紅紫盡。綠樹壓書堂。夢覺復烹茗。輕風滿袖涼。繞屋皆新樹。呼茶獨自煎。幽情誰與話。啼破一聲鶻。

夏曉

短夢未全熟。鷄鳴乍破眠。山光涼味足。苔色露華鮮。

洒水疎籬下。煎茶淨几前。氣清神爽處。無物不新妍。

雨窓排悶

休道陰霖思鬱陶。世紛却喜箇中逃。晴耕雨讀有家
憲。獨坐焚香誦楚騷。

寄蘆堂主人次其唱和韻

自鎖柴扉與世疎。陰霖也喜伴琴書。爲懷對碧山房
主。卒爾裁詩問起居。

簷滴疎時雨也疎。溪雲閑處好攤書。山人近日無聊
賴。欲訪南陽處士居。

雨窓排悶次蘆堂主人韻

湘簾晝猶暗。淫雨旣兼旬。獨坐古烟底。讀騷思古人。
歲月急於矢。忽々春又秋。箇中無一事。聽雨獨齟齬。
吟屐着何處。無聊閑夢牽。四簷連日雨。奈此杖頭錢。
旬日掩柴戶。簾陰看奕碁。物華移靜裡。庭樹長新枝。

祝山梨日日新聞一萬號

嚴霜如雪曉寒生。乍聽華鯨迷夢驚。一杵洪音幾千
里。居然也似萬雷轟。

秋夜偶拈

新秋故墟入。先訪野人家。一夜同僧話。竹檐初月斜。
四壁無人語。蟲聲冷薄帷。縮頭火燈下。獨讀劍南詩。

浴餘吟骨爽。背手步長塘。大月明如畫。板橋疑有霜。
吟蟲聲切切。奈此病餘身。月下彈琴坐。無端思故人。
風露夜蕭瑟。孤衾夢不成。凄然腸欲斷。屋後聽猿聲。

哭母

萬樹入悲秋。承歡志未酬。溫容觀不見。熱淚掃還流。
暗雨新墳下。酸風古寺頭。寒鴉呼友去。啞啞也添愁。

戊申元旦

堯曆三元日。穩波涵硯池。社頭松樹詠。壁上柏梁詩。
例染試書筆。更傳延壽卮。乾坤祥靄裡。一醉展雙眉。

春興

觸目溪村興更加。吟筇曳處路斜斜。風流不識誰家婦。
折取紅梅一朵花。

雪後看月

雪後風光夜色闌。窓前忽挂水晶盤。竹叢梅樹多奇趣。
不也尋常一樣看。

晚行

紛紛掠水暮禽飛。料識漁夫罷釣歸。頭上一痕昏夜月。
照他吟客到禪扉。

閑居

遠屋萬梅花發時。清茶一碗聽鶯兒。柴門鎖日無塵

事。好向閑中刪舊詩。

花時有感次孔桐隱士韻

題柱當年一曲歌。光陰也是易消磨。看花詩味向誰說。感慨無端不耐多。

回頭我又染紅塵。時序駁々萬物新。獨酌對花山院裏。香風吹送滿林春。

花時大雪即事

四月園林雪壓枝。嬌姿一段覺新奇。追懷修禊當年事。儂指偏驚歲月馳。

詠史

割據群雄指顧間。九泉之下欲無顏。千秋恨事終難雪。鬼語啾々天目山。
豈唯韜略壓群雄。善政施來草偃風。遺績干今忘不得。玄公堤上憶玄公。
欽仰越公文武才。軍門賞月酒詩催。宏懷別有照青史。千里輸墟敵國來。

賦得雪中松

膈膊鷄鳴復一年。欲將詩酒了清緣。青松白雪佳者在。好酌新醪賦短篇。

追悼廣瀨雨鳴翁

雨鳴山下水雲鄉。九十生涯甘遜藏。剩得風騷餘韻在。潛然一夜讀遺章。

初夏村居

托跡林泉樂此生。山園嫩葉促吟情。茅檐盡日霏々雨。伴我岑寥茶鼎鳴。

躑躅花開紅欲然。園林五月澹風煙。前溪日暮訪吟侶。佇聽一聲過杜鵑。

弔屈原

日本弘道會五月課題

五日江頭祭屈原。楚騷誦罷淚成痕。汨羅千里靈何在。空立斜陽欲慰魂。

庚戌歲旦

團欒此日醉金卮。歡語笑聲喧一時。客去南窓閑也好。瓶梅香底讀唐詩。

雪中聽鶯

小軒閑坐伴愁魔。倏聽梅梢黃鳥歌。徐下階除雪中立。隣翁笑問有詩麼。

春雪霏々曉景清。明窓攤卷惱詩情。恰有鶯兒能解事。遙送林間宛轉聲。

嫌他世局觸蠻爭。十載青衫邱壑情。占斷春風閑趣致。佇聽雪裏早鶯聲。

春雨

遲々永日雨成霖。淡抹輕煙隔水林。惆悵梅花箇中
盡。探春無計坐鳴琴。
煙雨連宵櫻較催。曉寒漠々夢初回。山人臥聽鶯兒
語。宛轉嬌音簾外來。

暮春偶成次竹蔭兄詩韻

飛花飄瞥難憑賴。紫褪紅殘自狼狽。山館詩成坐酌
醪。新鷓裂帛過林外。
芳草池塘青一寸。烏啼花落春衫褪。奔馳日月似彈
丸。素業蹉跎無限恨。

峽南煙景春將暮。奔下灘流挽難駐。聞說椿翁伴藥
爐。有麼依戀惜春句。

自註椿翁椿山也

追悼故樵山先生

佳城日落紫蘭薰。延壽山鐘愁裏聞。最是單身憑吊
處。歔歔吞淚讀碑文。
讀殘遺稿不堪愁。富水如今咽急流。一夜無端追慕
淚。朦朧月色入書樓。
夙興私學號蒙軒。俊秀彬彬出此門。欽仰先生心事
潔。遺風今尙峽南存。

夜坐

晚來風繚繞。涼味適幽情。坐嘯遂成癖。煩襟欣一清。
隔溪砧杵響。迎月玉徽鳴。忽聽庭前樹。飄來梧葉聲。

詠馬

一味秋風上瘦肩。心頭愁絕轉堪憐。料知橫臥柳陰
下。雄夢砂場十載前。
玉勒當年出洛城。遼東驅逐竭丹誠。如今瘦骨徒深
慨。野草風爲叱咤聲。

藤田五景

鼎池煙柳

輕煙吹暖日融々。一桁垂楊鳥語中。憶殺當年修禊
飲。騷人題詠樂無窮。

本堤亂螢

無風無月雨餘天。螢火照來明一川。堤上笑聲人未
散。紅羅袖影影翻々。

中瀨涵星

隔岸漁燈一點青。模糊人影映沙汀。逍遙來逐晚涼
處。水面熒々是蘸星。

釜川黃蘆

長江向晚棹扁舟。兩岸黃蘆凝兩眸。一味詩情與秋

冷。西風拂髮白鷗洲。

鶴塚孤松

塚上登臨懷古情。暮鐘聲裡夕陽傾。半天清淚無由聽。只有梢頭風籟鳴。

晚春雨後

細雨江南烟景晴。紅殘紫褪不堪情。老鶯憐箇饒春嘆。盡日前峰林裏鳴。

雨後園林翠欲流。一簾紅罷寂書樓。山人也是傷春處。兀々敲詩獨慰愁。

雨霽無聊試晚行。一堤春老淺沙清。忽聞笙韻水中

響。便是三溪河鹿聲。

自註三溪謂三澤川

夏日田園

忙事插秧罷。門前綠滿疇。東林梅正熟。南隴麥全秋。古池泉響大。閑庭竹影幽。田居詩思淨。高臥讀書樓。

梅雨讀書

濕潤入梅節。無端十日霖。案頭香篆緩。砌下屐痕新。兀坐唯耽酒。閑愁獨抱琴。楚騷和雨讀。憶殺古賢心。

曝書

懶惰于今腹笥空。青衫落々志難攄。秋風空惹十年

悔。蠹蝕叢殘一架書。

夜坐

涼風拂暑月臨欄。一笛隣樓夜色殘。獨坐暗知秋意淺。群蛾撲火讀書難。

春日偶成

二首

春風吹不絕。養病臥山家。孤酌消愁酒。閑煎解醉茶。
霏々前夜雨。變々早朝霞。剝啄隣翁到。寄來幽谷花。
峽南風物好。冰雪已無痕。鶯語禪林寺。煙籠處士門。
竹筇耽野趣。書卷滌塵煩。適意吟連日。雙柑醉酒樽。
南陽八勝

魁春園梅花

暖入林叢興味新。鶯兒早報一枝春。清香陣々襲衣袂。不看當年高臥人。

自註高臥人即謂篠屋夫子

蘆川橋納涼

人倚橋欄待月明。夜涼如灑雨餘清。吹笙誰試瓏々曲。半和風聲半瀨聲。

平壩岡夕照

遺蹟蕭條草樹荒。登臨景物轉悲涼。看他屹立銅碑畔。空有野翁耕夕陽。

押切沼落雁

渟瀟蒼茫水洗空。風前對月望飛鴻。何來頭上數行
字。落到秋蘆抽白中。

小御崎夜雨

老樹森然風拂欄。祠燈如豆已更闌。梟聲叫斷霏々
雨。佇聽行人覺骨寒。

烽臺山秋月

露氣逼人秋也涼。風光最是古南陽。一痕天上烽臺
月。偏照山青水白鄉。

寶壽院暮鐘

楓樹疎々掩梵樓。金剛山下熟禾秋。黃昏數杵洪鐘
吼。農女急鞭驅牧牛。

蛾眉峰晨雪

幽夢醒來曉景明。階前一様雪鋪瓊。佳人昨夜新粧
就。驚見蛾眉偏有情。

賀繁田家之盛儀謹賦以贈

襟懷洒落弄煙霞。仰見祥雲積善家。獻壽金婚開宴
日。詩歌俳畫筆生花。

東宮殿下行啓峽中恭賦紀感

駐驛峽中天日麗。惠風千樹競春芳。臺臨躑躅古城

趾。地下英雄魂亦香。

懷人絕句次岳北隱士韻

蘆堂詩宗

蛾眉山翠迥泥人。遺業居然筆有神。世態知他多感慨。近來大道奈輪囷。

峽南軍醫

幾度從軍聘硝煙。襟懷落落儘狂顛。憐君一病沈綿久。藥縷蕭條繞屋椽。

竹隱上人

隱公意氣壓群雄。弔鬼邊疆心血紅。那得野毛山畔

夕。敲門月下接高風。

聞峽南軍醫訃音作

一病多年痛淚多。憐他身世逐奔波。天涯淪落魂安在。詞客由來易輓軻。

從軍當日氣吞牛。落落風懷不說愁。回憶今春三月暮。無端一夜話江樓。

玉笛隣樓帶恨吹。才人薄命詎堪悲。半生心血傳遺稿。泣讀燈前一卷詩。

祝宮澤軍醫正創業於蛾眉山下賦呈攀

蘆堂詩宗礎

壯年意氣劍凝霜。三折秘方名忽揚。解綬蛾眉山下處。膏盲探病揭青囊。

大正癸丑初冬

北白川大王殿下治兵峽城外駐駕廣瀨梧村翁

家翁善書應命揮毫辱賜嘉賞云賦祝

劍氣如霜仰盛威。旆旌今日駐郊扉。梧翁奏技知窮妙。蜿蜒秋蛇筆底飛。

春初雜詠

笑吾疎放笑高官。卅載村莊一枕安。迎客拈詩吟骨瘦。呼朋把酒病驅嘆。時聞富水漲聲激。日見閑雲浮

影寬。莫謂東風今尙勁。敝衣垢面不知寒。

壩山向嶽精舍雅集分韻得陽

春光轉眼入仙鄉。風片雨絲新綠涼。不負清遊騷客飲。聯吟盡日醉歌長。

早春出游詩草

富士川

欲試早春三日遊。冒晨結束抵河流。霜華簌々屐微響。好上頭番南下舟。

展早川峽南君墓

飄々君是謫仙才。醉骨天涯遂不回。憐箇佳城無弔

客。哀鳴啄雪一禽來。

屏風巖

自訝遊心雪後生。一枝吟杖一身輕。屏風巖似屏風
畫。佇立多時撫景行。

下山

緩步微吟心自閑。夕陽指顧立林間。當年館址知何
處。絃誦洋洋古下山。

自註穴山氏墟今爲村庠故及

自下山抵南部途上

斜通一路斷崖前。村店茶煙響笈泉。最是幽深堪畫

處。松疎竹密板橋邊。

南部途上憶故近藤椎山翁

興學多年化一鄉。三楹栽植講良方。峽南山翠周遭
在。遺業于今與水長。

展木內椿山翁墓

拜跪墳前酌酒杯。幽明隔絕有餘哀。仙翁地下爲何
感。碌々無聞阿姪來。

出府詩草

富水曉渡

拂曉輕裝覓句行。四邊勝景未分明。岸頭呼起篙師

夢。佇聽涓々石瀨聲。

禹瀨

聞說鑿開勞禹功。夷然舟楫往來通。倚舷灘水淙々底。岸駛山移指顧中。

自歛澤搭鐵道馬車抵甲府

一鞭快駛早於舟。水郭山村風物幽。誰識炎威驕熾日。車窓爽氣颯疑秋。

車窓望市川懷蘆堂詞伯

僻遠寒陬寄此生。多年辜負鷺鷗盟。琴書近日爲何狀。顧望蛾眉山翠清。

訪靜所詞宗甲府僑居

峽城先訪隱棲家。也接清姿吟意加。擺晚平生塵擾事。雅談不識夕陽斜。

古城懷古

山勢周遭開洞天。興亡往事箇中遷。當年霸迹無尋處。只見荒墟樹似煙。

秋夜書感

老屋殘燈寂四隣。回頭深夜幾傷神。累囚法峻網羅密。澤國秋寒風雨頻。雁度半空疑月叫。人經窮路見天真。青衫意氣仍憂世。故態依然淪落身。

新年

春酒到臍情自舒。瓶梅高潔一枝疎。山人靜坐緣何事。翻讀先秦以上書。

藤田芭詒川堤雜賦

東郊日暖水渠通。鬢鬢櫻雲一抹紅。聞說梧翁手栽植。滿堤遊客醉春風。
此地由來五景嘉。芭川更見勝光加。休誇駘蕩墨陀塢。紅罩長堤十里花。
無風無雨絕纖塵。岸柳汀花處々新。好與吟朋來覓句。半晴三日滿堤春。

傘影衣香逐日滋。十分春色盛開時。少年亦着鬢邊雪。一陣狂風乍拂枝。

釜西指點隱栖村。帘閃蘆簾野店門。手植櫻花方爛發。高人與客醉清樽。

秋夜聽虫 三首

獨坐殘宵剔短檠。秋涼一味沁腸清。自今還得親書卷。壁有幽蛩切々聲。

嗟被新霜髮髮侵。每逢搖落易傷心。絕憐細雨淒蕭夕。砌下虫聲和苦吟。

秋入山居徹骨清。燈前一夜萬愁生。詩星底事飄零

盡。付與莎虫草下鳴。

自註近來峽中騷客多易簣可痛也

一月十四日太田公園清華吟社雅集

席上探韻得東

瀟洒樓臺落木叢。詩筵也着白頭翁。多年交誼盃浮蟻。半日吟情筆吐虹。鈴韻祠前板橋雪。梅花邱後酒旗風。開年最喜陪名士。乞教掀髯談笑中。

菅公

吟社二月課題

高明瞻仰棟梁材。末路顛蹉不耐哀。野廟梅花遺烈在。東風二月暗香來。

聽鶯

同

上

厭他時局觸蠻爭。嘯月吟花憐此生。不用逢人談逐鹿。瘦筇去聽早鶯聲。

二月四日太田公園清華吟社雅集

席上探韻得灰

也訪孤王祠畔梅。驟暄此日恰春回。吾生先倒一樽酒。注向吟腔案句來。

更得二絕句

春風忽漫到梅花。一坐詩仙笑語譁。脫却人間塵十丈。清娛不覺夕陽斜。

英雄骨朽冷煙霞。指點古城飛暮鴉。聞說村莊荒廢甚。有誰帶月訪梅花。

賀甲南青柳翁還曆次其自壽韻乞教

搖手謝塵海。優遊物外身。仰瞻人若玉。對坐氣如春。經雨花唇笑。含風柳眼伸。育英閑事業。桃李作蹊新。

過新府

吟社三月課題

來弔當年蓋世雄。山河滿目感何窮。雙行不禁詞人淚。日落空城煙雨濛。

下部溫泉遇蘆堂

合沓青山似洞門。一溪涼味滿層軒。今游偏喜不徒

爾。同浴靈泉洗世煩。

同次蘆堂詩韻

多謝詞盟倒屣迎。高樓促膝共揚觥。曾游回首十裘葛。也對青山慰客情。

偶拈二首

年光瞥々夢中過。髮上加霜感更多。一夜閑窓空自歎。平生志業奈蹉跎。

愧我無聞夙志空。吟花嘯月了生涯。秋風回首曾遊迹。默々酒痕衣袂紅。

寄懷青柳甲南翁次其病餘示人詩韻

病餘謝客好求仙。經卷藥爐閑夢牽。一夜秋風聞雁渡。萬般情緒歎流年。

聞君久臥白雲山。世上紛紛渾不關。何合快談長一夕。夢魂偏繞夢山還。

送古明地校長轉任于峽東中牧 二首

愛撫群生九載間。離筵安得笑開顏。冥鴻返處人還去。徒剩曾遊一座山。

眼看峽南春正闌。櫻桃取次笑唇丹。河梁今日分携處。暗雨蕭々雙袖寒。

自註此日春雨蕭々結故及

次梧村廣瀨翁病起書感韻賦呈

枕上藥爐殘火紅。三春將暮臥床中。落花節到病方癒。也喚尖奴對晚風。

讀甲南青柳翁次嶋翁韻夏初詩用

其韻寄懷

過眼春光醉夢中。推移世態亦相同。鷓聲初度檐端綠。蝶影猶迷葉際紅。我愛桑麻生計澹。君推翰墨藻才豐。柳坪門下問詩客。寥落惟餘是此翁。

秋夜獨坐

陰蟲切々入牀悲。月下雙砧相和時。一夕淒愴驚病

骨。十年慷慨奈霜髭。溪山近屋秋聲早。風露侵窓夜漏遲。耿耿漫將書劍檢。沈吟偏誦遣愁詩。

初夏閑居次蘆堂詞宗韻

嫩綠壓軒宜讀書。青衫依舊意何如。閑窓睡覺方思茗。一鼎輕煙夕照初。

春來身世轉悽如。中夜魂迷太臯墟。喪怙便知老將至。鬢邊先認二毛初。

自註今春喪家嚴故及

次唱和韻寄甲南詞伯

謝客避塵常掩門。溪村風露早秋繁。閑情迎月對雲

嶂。適意攤書臥水軒。空抱邦家千載計。還思怙恃畢生恩。居喪半歲多幽悶。一事不嫌詩律煩。

秋雨對客

山郭蕭條秋信通。一聲賓雁度遙空。惠然客到閑窓雨。搖曳雲移遠岫風。俯仰撫髯誇景勝。應酬把酒說英雄。人生是々非々事。儘托毛錐氣吐虹。

中秋

夙志蹉跎夢一場。每逢佳節痛心長。獨憐今夜中秋月。皎々照吾雙鬢霜。

詠史

弟兄侍枕病帷中。瀕死慙勲諭和衷。折矢便知合同力。恢弘遺業二川公。

哺乳經嘗幾苦辛。報讎還作跼天身。憐他腰越一篇狀。廷尉終生不遇人。

雄略當年豐太閣。宣威海外震明鮮。曾從皂隸把鞋手。文武併收天下權。

簡甲南翁

也是鵲雲蛙雨時。滿園新樹與人宜。先生近日如何狀。只試懸針不作詩。

山村避暑

居對叢祠水作隣。不知何處有炎塵。山中高臥夢魂穩。笑殺都門名利人。

訪青柳甲南翁賦呈

匆匆歲月似彈丸。早已秋霜染髮端。耆宿如今存幾許。訪君也是請加餐。

蘭洲詩稿 第一集 終

大正十年二月一日印刷

大正十年二月五日發行

著者
作行人

兼人

深澤

澤儀

儀

喜

山梨縣西八代郡久那土村三澤

千八百八十五番地

山梨縣甲府市百石町三八〇

印刷人

山岡

英

夫

夫

山梨縣甲府市百石町三八〇

印刷所

山岡

印刷

所

所

11
419

終

